

bili rectore. Deinde, si ille invisibilis influxus Spiritus Sancti sufficiens esset pro Ecclesia visibili, non tantum Spiritus Sanctus, sed etiam Christus ipse absens, et nunc nobis invisibilis, dici posset sui ipsius praesentis seu visibilis Vicarius, quia de se etiam promisit : *Ecce ego vobiscum sum omnibus diebus usque ad consummationem saeculi*, utique invisibili protectione et auxilio, ut in superioribus explicavi. Præterea si Christus, quia est principalis monarcha Ecclesiæ, illi non contulit rectorem visibilem, qui loco ipsius eam gubernaret, cur rex Angliæ, in sua Præfatione¹, se et alios reges vicarios Dei appellat? nam (juxta suam opinionem, qua se credit esse caput Ecclesiæ in regno suo, etiam in spiritualibus) necesse est ut, cum se appellat vicarium Dei, intelligat, non solum quoad regnum temporale, sed etiam quoad ecclesiam Britannicam; ergo repugnat sibi ipsi, cum dicit Christum non reliquisse vicarium sui, præter Spiritum Sanctum.

15. *Veram spiritualem jurisdictionem Christus Dominus Petro contulit.* — Denique falsum est Christum non promisso Petrum, qui alios dirigeret aut doceret; non enim solum promisit, sed etiam dedit, nam promittendo ei claves, et clavem regiminis, et clavem scientiæ promisit. Item quando illi dixit : *Rogari pro te, ut non deficiat fides tua, statim addidit : Et tu aliquando conversus confirma fratres tuos.* Ac denique cum illi dixit : *Pasce oves meas*, et doctrinam, et regimen seu directionem manifeste comprehendit, ut infra videbimus. Et ultra hæc in multis aliis locis significavit Christus futuram esse in Ecclesia præfecturam spiritualem, et aliquem, vel aliquos ministros suos, qui tanquam propria et visibiles vicarii vicem ejus gerant. Ita intelligunt Patres illud Lucæ 10 : *Qui vos audit me audit, et qui vos spernit me spernit.* Ambrosius ibidem, et Hilarius, Can. 27 in Matth. Idem colligit Chrysostomus, lib. 2 de Sacerdot., ex Luca 12. Nam cum Christus sub parabola patris familias, qui vult magna vigilancia et sollicitudine a suis subditis expectari et obediri, declarasset quomodo sit Dominus serviendum, Petrus eum interrogavit : *Domine, ad nos dicas hanc parabolam, an ad omnes?* Respondit autem Christus : *Quis putas est fidelis dispensator et prudens?* significans, Apostolos specialiter vocatos fuisse ut essent tanquam præcipui servi, quibus alio-

¹ Pag. 134.

rum cura demandanda erat; et præcipue Petrum, qui super totam familiam Christi erat constituendus, non solum ad communem vigiliam, sed etiam ad specialem fidelitatem et prudentiam obligari. Quam curam et oblationem commemorabat Petrus, cum dicebat : *Pascite, qui in vobis est, gregem Dei, providentes non coacte, sed spontanee, secundum Deum.* Et consonant verba Pauli, 1 Cor. 4 : *Sic nos existimet homo ut ministros Christi, et dispensatores mysteriorum Dei; hic jam queritur inter dispensatores, ut fidelis quis inventiatur, etc.; et c. 3 dixerat : Quid igitur est Apollo, quid vero Paulus? ministri ejus cui credidisti*, id est, Vicarii ejus, et loco illius Ecclesiam regentes; et ad Rom. 13, temporalis principem, vel judicem, Dei ministrum appellavit.

16. Nam quod illud ministerium apostolicum fuerit, etiam cum potestate et jurisdictione ad ferendum judicium, satis declarat idem Paulus, in fine dict. c. 4, dicens : *Quid vultis? in virga veniam ad vos? et cap. 5: Ego quidem absens corpore, praesens autem spiritu jam judicari, ut praesens, eum, qui sic operatus est, in nomine Domini nostri Iesu Christi, etc., tradere hujusmodi Satanæ in interitum carnis, ut spiritus ejus salvus fiat,* etc. Et 2 ad Cor. 13 : *Si venero iterum, non parcum, etc.* Et expresse ad Hebr. 13 : *Obedite præpositis vestris, et subiacete illis, ipsi enim pervigilant, etc.* Et 1 ad Timoth. 5 : *Qui bene praesunt presbyteri duplii honore digni habeantur.* Et ad Titum 1 : *Oportet Episcopum sine crimen esse sicut Dei dispensatorem, etc.* Et c. 2. *Hac loquere, et exhortare, et argue cum omni imperio.* Denique hoc spectant loca Pauli, in quibus describit unitatem corporis Ecclesiæ, et varia membra ejus, ut ad Roman. 12, ubi inter alia ait : *Qui præest in sollicitudine, et 2 ad Cor. 12, et ad Ephes. 4, ubi ponit, Apostolos, Prophetas, Evangelistas, Pastores et Doctores in opus ministerii, in edificationem corporis Christi.* Quem modum gubernationis dicit esse duraturum, usque ad consummationem Sanctorum, id est, usque ad mundi finem, ut in superioribus explicatum est.

17. *Distinctio inter spiritualem et temporalem potestatem.* — Atque ex his constat manifeste, hanc potestatem spiritualem esse omnino distinctam a temporali. Primo quidem et principaliter in fine; nam temporalis potestas ordinatur ad servandam reipublicæ pacem, et moralem honestatem, juxta illud

Pauli, 1 ad Timoth. 2 : *Ut quietam et tranquillam vitam agamus in omni pietate et castitate.* Potestas autem ecclesiastica ad æternam salutem consequendam ordinatur, juxta illud Pauli ad Ephes. 4 : *Ad consummationem Sanctorum, etc.*; et illud ad Hebreos 13 : *Obedite præpositis vestris, ipsi enim pervigilant, tanquam rationem pro animabus vestris reddituri.* Alia differentia est in origine, quia potestas temporalis trahit originem a Deo auctore naturæ media ratione naturali, et ita per se spectata est de jure naturali; prout vero est in rege vel senatu, est de jure humano; potestas autem ecclesiastica est de jure divino positivo, et speciali promissione et concessione Christi : *Tibi dabo claves, Pasce oves meas, Sicut misit me Pater, et ego mittio vos.* Sicut enim finis, ad quem ordinatur hæc potestas, et actus ac media quæ illi subsunt, sunt supra naturam et vires humanae, ita et potestatem ipsam habere originem supra jus naturæ vel humanum necesse est. Et ideo tandem hæc potestates differunt tanquam materialis et spiritualis, naturalis et supernaturalis, terrestris et cœlestis. Atque ita explicant distinctionem hanc Gelasius Papa, de Vinculo anathematis, et Nicolaus I, in epistol. ad Michaelem Imper., circa finem, dicens : *Mediator Dei et hominum homo Christus Jesus, sic actibus propriis et dignitatibus distinctis officia potestatis utriusque discrevit, propria volens medicinali humilitate sursum efferri, non humana superbia rursus in inferno demergi, ut christiani imperatores pro aeterna vita Pontificibus indigerent, et Pontifices pro cursu temporalium tantummodo rerum imperialibus legibus uterentur, quatenus spiritualis actio carnalibus distaret in cursibus.* Easdem differentias attingit Gregorius VII, l. 4 Epistol., ep. 2 ad Herimanum, easque ex Anastasio Papa, in ep. ad Anastasiū imperatorem, et Gregorio in Pastorali, confirmat. Idem docet Symmachus, in Apologia contra eumdem Anastasiū imperatorem dicens : *Conferamus honorem imperatoris cum honore Pontificis, inter quos tantum distat, quantum ille humanarum rerum curam gerit, iste divinarum.* Et infra : *Tu humana administras, ille tibi divina dispensat.* Idem Symmachus, in Synodo Romana, et refertur late in cap. *Bene quidem, 96 dist.*, et plura alia in duabus capitibus sequentibus refereamus.

18. *Solvuntur fundamenta errorum in principio capituli relatorum.* — Neque huic doctri-

næ catholicæ obstant fundamenta aliorum errorum, quæ in aliis hæresibus fundantur, quas non possumus hoc loco ex professo refutare. In fundamento ergo primi erroris hæreticum est dicere, non esse in Ecclesia Christi verum et visible sacrificium, aut verum et proprium sacerdotium. Et similiter hæreticum est dicere, omnes fideles esse in sacerdotio æquales, quæ omnia alibi sunt a nobis disputata et probata. Marsilius etiam Paduanus in fide errat, dum supponit omnes clericos, seu sacerdotes et Episcopos, jure divino esse æquales. Nam quoad potestatem ordinis ex institutione Christi Episcopus excedit presbyterum, et presbyter diaconum, etc., ut in tractatu de Sacramento Ordinis late ostenditur. In potestate autem jurisdictionis est de Apostolis certissima differentia, quæ ex adductis testimoniis facile colligi potest, et quoad Petrum, et successores ejus, late in sequentibus ostendetur. Præterea quod ait, Christum prohibuisse Pontificibus temporaliter regnare, imprimis omnino falsum est et erroneum, ut cap. 8 ostendemus. Deinde ad id, quod nunc agimus, nihil refert, quia etiam si illud admitteretur, solum inde posset inferri Episcopos, aut Pontifices, per potestatem quam habent, ut tales sunt, non temporaliter regnare, sed spiritualiter, quod nos omnino contendimus, cum dicimus potestatem illorum non temporalem esse, sed spiritualē.

19. Et hoc ad summum probat testimonium illud : *Reges gentium dominantur eorum, vos autem non sic* (quod etiam rex Angliæ non omisit), nam etiam in illo sensu non prohibet Christus Apostolis regnare, sed sic regnare sicut reges gentium, id est, temporaliter; necesse est autem ut spiritualiter regnent saltem illi, qui supremam in illo ordine potestatem habent. Nisi velimus dicere, etiam Summum Pontificem non tam proprie regnare spiritualiter quam vice regnare, quia non tanquam supremus rex, sed tanquam Vicarius summi Regis Ecclesiæ præest. Veritas autem est non prohibuisse Dominum regnare, sed gubernare dominando personis, per elationem se illis præferendo, aut inhumaniter subditos tractando, ut dixit Gregorius, in Pastoral., 2 p., cap. 6, qui verba Christi exponit per illa Ecclesiast. 32 : *Ducem te constituerunt, alias, rectorem te posuerunt, noli extolliri, esto in illis quasi unus ex ipsis;* et per illa 1 Petr. 5 : *Non dominantes in cleris, sed forma facti gregis ex animo;*

et per illa Pauli, 2 ad Cor. 4: *Non quia dominemur fidei vestrae, sed adjutores sumus gaudii vestri.* Et similia habet Gregorius, 36 Moral., cap. 19, alias 22, et lib. 1 Registri; et Bernard., lib. 2 de Consider., in principio. Et ita per haec etiam responsum est ad fundamenta quae in hoc punto attingit rex Angliae; ad alia vero quae objicit contra primatum Pontificis, et contra verum sensum Scripturarum, quibus ille probatur, in sequentibus dicendum est.

CAPUT VII.

POTESTATEM REGENDI ECCLESIAM IN SPIRITALIBUS SEU ECCLESIASTICIS REBUS, IN TEMPORALIBUS REGIBUS SEU PRINCIPIBUS NON EXISTERE, AUCTORITATE PROBATUR.

1. *Quomodo sese habeant potestas spiritualis et temporalis, in ordine ad subjectum.* — Error Anglicanae sectæ circa subjectum spiritualis potestatis. — Praeter differentias inter potestatem spiritualem et temporalem in praecedenti capite traditas, intercedit alia, quam, quia origo est, et præcipuum Anglicani schismatis fundamentum, in hoc caput examinandam reservavimus, quanquam ex principiis positis in praecedenti capite manifeste concludatur. Consistit autem hoc discrimen in hoc, quod potentia temporalis et spiritualis per se non respiciunt easdem personas, quibus convenire debeant, sed potius sunt subjecto separabiles, quod plane supponit distinctionem inter illas, et eam indicat. Duobus autem modis extreme contrariis circa discrimen hoc errari potest. Primo, asserendo potestates has non solum esse distinctas, sed etiam esse adeo repugnantes, ut in eadem persona conjungi, divino juri contrarium sit. Et ita videtur errasse Marsilius de Padua, quanquam ille vel spiritualem potestatem cum temporali confundat, vel non in quocumque subjecto, sed solum in sacerdotibus neget posse simul convenire. Verumtamen hic error hoc sensu intellectus fundamentum non habet, et in capite sequenti breviter impugnabitur, quoniam ad præsens institutum parum refert. Alius ergo modus errandi est proprius Anglicanae sectæ, cuius principium et fundamentum est, potestatem spiritualem non separari a temporali, sed regio sceptro esse annexam. Ita voluit Henricus VIII, quem successores ejus Eduardus et Elizabetha secuti sunt, ut late refert Sander., in tribus primis libris de

schismate Anglicano, ubi etiam varias leges ad hujus potestatis amplificationem in illo regno a dictis principibus latas describit.

2. Denique in hoc errore persistit rex Jacobus, ut ex factis ejus satis constat, et in Præfatione sua saepe profitetur, præsertim pag. 5 Præfationis, dicens: *Nam neque me Pontifice ulla ex parte inferiore esse credam.* Et in eodem sensu dicit pag. 2, de temporalibus regibus, *quos Deus in altissimo dignitatis gradu, quasi suos vicarios et legatos ad exercenda judicia in suo solo collocarit.* Et iterum ad reges, pag. 10: *Quos Deus præcipios sibi in terris vicarios in administratione justitiae esse jussit.* Et in eodem sensu dicit pag. 14, controversiam, quam cum suis subditis catholicis habet, non aliunde esse motam, *quam ab ambitiosa Pontificum tyrannide, quam illi contra auctoritatem Scripturarum, contra Conciliorum antiquorumque Patrum mentem, sibi in temporalia regum jura injuste usurparunt.* Tandemque ibidem concludit, in hac regum auctoritate asserenda (utique in hoc sensu) totam suam apologiam impendisse. Hujus autem erroris fundamentum solum videtur esse, quia non agnoscit distinctionem inter potestatem spiritualem et temporalem, et quia negat primatum Petri et successorum ejus, de quibus in sequentibus capitibus dicemus.

3. *Prima conclusio: regibus temporalibus, ut tales sunt, nulla spiritualis potestas competit.* — Veritas ergo catholica est, reges temporales, ut tales sunt, seu ratione sue jurisdictionis supremæ in principatu politico, nullam habere in Ecclesia spiritualem potestatem. Hæc assertio probari potest auctoritate Scripturæ duabus modis. Primo, quia in Testamento novo hæc potestas promissa et data est a Christo illis personis, qui reges temporales non erant. Secundo, quia non invenitur data regibus temporalibus, et ex utroque capite, tam sigillatim quam simul sumpto, recte concluditur non esse in regibus temporalibus, quia non potest esse nisi in illis quibus a Christo data est, et eorum legitimis successoribus. Prior pars sufficienter probatur testimoniis adductis capite praecedenti, quibus constat Christum singulariter promisso et dedisse hanc potestatem Petro. Deinde aliunde etiam monstratur, dedisse illam omnibus Apostolis, Joan. 20, quibus, et successoribus eorum sub nomine Ecclesie eam promiserat, Matth. 18. Alia etiam testimonia ostendunt, Paulum saepe esse usum hac potestate, eam-

que in Episcopis et Ecclesiæ præpositis inventi, et ab eisdem exerceri; nullus autem istorum rex erat, aut jurisdictionem temporalem administrabat. Unde etiam sumitur efficacissimum argumentum: nam, priusquam in Ecclesia essent reges temporales, erant in Ecclesia pastores cum vera jurisdictione spirituali ad regendam Ecclesiam, ut ex usu ejusdem potestatis, et ex allegatis testimoniorum manifeste colligitur; ergo potestas hæc de se non pendet ex regia potestate, neque cum illa ex vi illius conjuncta est; tunc enim reges temporales illam non habebant, neque ab eis illam repererant, qui legitime illa utebantur.

4. Et hinc etiam aperte probatur ex Scripturis (quod etiam capite superiori attigimus), hanc potestatem alterius esse originis, quam temporalem; nam temporalis potestas, prout invenitur in rege, vel alia simili persona, vel proxime, vel per successionem, aut alium humanum titulum, provenit a multitudine populi, qui suam auctoritatem principi contulit; hæc autem potestas illam originem non habuit; nam in primitiva Ecclesia Apostoli illam habuerunt, non a populo christiano, sed ab ipso Christo; et alii Episcopis illam communicarunt auctoritate sua, et independenter a populo, ut patet ex illo Pauli, ad Titum 1: *Hujus rei gratia reliqui te Cretæ, ut ea que desunt corrigas, et constitutas per civitates presbyteros, sicut et ego disposui tibi.* Et 1 ad Tim. 4: *Noli negligere gratiam, quæ in te est, quæ data est tibi.* Et c. 5, ostendit fuisse cum jurisdictione episcopali, dicens: *Adversus presbyterum accusationem noli recipere, nisi sub duobus aut tribus testibus, etc.* Cum ergo ex praecedentibus capitibus constet, totam potestatem regiam a populo proxime manasse, consequens profecto est ut ex vi regiae potestatis nulla sit in rege spiritualis jurisdictione vel potestas.

5. Tandem altera probatio ab auctoritate, quam vocant negativa, Scripturæ, in præsenti efficax est ex eodem principio et fundamento. Nam, ut recte dixit D. Thomas¹, in his, *que sunt supra naturam, soli auctoritati crediuntur, et quæ ex sola Dei voluntate proveniunt supra omne delitum creaturæ, nobis innotescere non possunt, nisi quatenus divinitus revelata sunt;* sed spiritualis potestas Ecclesiæ donum est superans naturam, et ex divina voluntate et institutione pendet, tam ut sit, quam ut in tali

¹ 1 p., q. 101, art. 1.

persona, vel per talem modum aut successiōnem sit. Nulla est autem divina revelatio vel auctoritas quæ ostendat, Christum potestatem hanc regibus temporalibus dedit; ergo, ut D. Thomas supra dicit, *ubi auctoritas deficit, sequi debemus naturæ conditionem.* Quæ quidem conditio naturæ in præsenti est, ut temporalis rex solum eam potestatem habeat, quam homines naturali ratione ducti illi conferre potuerunt, ac subinde nudam ac præciam habeat temporalem potestatem. Quod autem divina auctoritas majori potestati regum testimonium non præbeat, manifestum est. Nam imprimis extra Scripturam adversarii non admittunt verbum Dei, et quamvis admitterent, nulla est sacra seu apostolica traditio, quæ talem potestatem in regibus indicet, sed contrarium potius, ut ex discursu hujus capituli et totius libri præsentis constabit. De Scriptura vero sufficienter id probamus postulando testimonium, ubi Christus hanc potestatem regibus contulerit, quod sine dubio ostendi non poterit, neque in veteri, neque in novo Testamento. Nam testimonia, quæ afferri solent, in quibus regibus obedire præcipimur, frivola sunt, cum nihil de nova potestate a Christo regibus concessa continant, sed illius tantum obligationis naturalis nos moneant, qua regibus, in his quæ ad eorum jurisdictionem pertinent, præcipientibus obedire tenemur, ut latius inferius respondendo ad objections declarabimus. Hic vero ponderari potest, Paulum, ubicumque ecclesiasticam hierarchiam describit, ejusque fundamenta, structuram, ministeria et gubernationes distinguit, numerare quidem Apostolos, Prophetas, Pastores et Doctores, regum autem et imperatorum nullam mentiōnem, non quia illi non essent in Ecclesia futuri, sed quia, quod ad ordinem hierachicum Ecclesiæ spectat, illi proprium gradum non constituunt, sed cum laico populo computantur, nec inter eos, qui ad ædificandum in rebus spiritualibus Christi corpus usque ad consummationem Sanctorum positi sunt, sed inter eos, qui ædificandi sunt et consummandi, tantum recensentur. Denique expendi potest, quod Christus Dominus, interrogatus an liceret censem dare Cæsari, accurate respondit: *Redde quæ sunt Cæsar's Cæsari, et quæ sunt Dei Deo,* indicans profecto, Cæsari, id est, imperatori vel regi solum illud esse reddendum, quod ex vi cæsareæ seu regie potestatis debetur. Christus ergo, ut graviter Salmeron notavit, sicut potestatem regiam non